

|             |        |        |        |        |
|-------------|--------|--------|--------|--------|
| 東 京 圖 書 館   |        |        |        |        |
| 一<br>二<br>〇 | 三<br>八 | 三<br>七 | 三<br>〇 | 目<br>録 |
| 冊           | 號      | 架      | 函      | 類      |
|             |        |        |        | 漢 書 門  |


欽定四庫全書總目卷五十六



国立国会図書館 タイトル『欽定四庫全書總目200卷首1卷』 請求記号 897-102

ガラス使用





国立国会図書館 タイトル『欽定四庫全書總目200卷首1卷』 請求記号 897-102

ガラス使用





欽定四庫全書總目卷五十七

史部十三

傳記類一

明治十年購求

紀事始者稱傳記始黃帝此道家野言也究厥  
本源則晏子春秋是即家傳孔子三朝記其記  
之權輿乎裴松之註三國志劉孝標註世說新  
語所引至繁蓋魏晉以來作者彌賧諸家著錄  
體例相同其參錯混淆亦如一軌今略為區別  
一曰聖賢如孔孟年譜之類二曰名人如魏鄭

欽定四庫全書總目卷五十七

史部 傳記類一





公諫錄之類三曰總錄如列女傳之類四曰雜錄如駿鸞錄之類其杜大圭碑傳琬琰集蘇天爵名臣事略諸書雖無傳記之名亦各核其實依類編入至安祿山黃巢劉豫諸書既不能遽削其名亦未可薰蕕同器則從叛臣諸傳附載史末之例自為一類謂之曰別錄

孔子編年五卷

浙江范懋柱家天一閣藏本

舊本題宋胡舜陟撰考書首有紹興八年舜陟序乃自靜江罷歸之日命其子仔所撰非舜陟自作

也舜陟字汝明績溪人大觀三年進士靖康間官侍御史南渡初知廬州有禦寇功更歷數鎮最後為廣西經略使欲為秦檜父建祠高登不可因劾登以媚檜會以他事忤檜意亦逮治死於獄事蹟具宋史本傳仔字元任後流寓吳興嘗輯詩話行於世即所謂茗溪漁隱者是也是書輯錄孔子言行以論語春秋三傳禮記家語史記諸家所載按歲編排體例亦如年譜其不曰年譜而曰編年尊聖人也自周秦之間讖緯雜出一切詭異神怪之





說率託諸孔子大抵誕謾不足信仔獨依據經傳  
考尋事實大旨以論語為主而附以他書其採掇  
頗爲審慎惟諸書紀錄聖言不能盡載其歲月仔  
旣限以編年不免時有牽合如左氏襄公二十一  
年鄭人游鄉校傳仲尼聞是語也云云杜預注謂  
仲尼於是年實是十歲長而後聞之知孔子爲此  
言不當在是年也仔乃繫其事於十歲之下殊爲  
疎舛又禮記儒行篇對魯哀公云云則繫之六十  
八歲哀公問篇大禮何如云云則又繫之七十二  
歲不知何所據而云然此類尤失於穿鑿然由宋  
迄元明集聖蹟者其書日多亦猥雜日甚仔所論次  
猶爲近古故錄冠傳記之首以見濫觴所自焉

東家雜記二卷

浙江范懋柱家  
天一閣藏本

宋孔傳撰傳字世文至聖四十七代孫建炎初隨  
孔端友南渡遂流寓衢州紹興中官至右朝議大  
夫知撫州軍州事兼管內勸農使封仙源縣開國  
男是編成於紹興甲辰上卷分九類曰姓譜曰先  
聖誕辰諱日曰母顏氏曰娶元官氏曰追封諡號

欽定四庫全書總目卷五十七

史部 傳記類一

三



日歷代崇封曰嗣襲封爵浴改曰改衍聖公曰鄉  
官下卷分十二類曰先聖廟曰手植檜曰杏壇曰  
後殿曰先聖小影曰廟柏曰廟中古碑曰本朝御  
製碑曰廟外古蹟曰齊國公墓曰祖林古蹟曰林  
中古碑其時去古未遠舊蹟多存傳又生長仙源  
事皆目睹故所記特爲簡核前有孔子生年月日  
考異一篇末題淳祐十一年辛亥秋九月戊午朔  
去疾謹書末有南渡廟記一篇題寶祐二年二月  
甲子汝騰謹記二人宋宗室子故皆不署姓去疾

稱舊有尹梅津跋此本無之而後有淳熙元年葉  
夢得跋蓋三篇皆重刻所續入也去疾考中歷駁  
諸家之誤而以爲春秋用夏正定孔子生於十  
月二十一日卒於四月十八日其說殊謬殆由是  
時理宗崇重道學胡安國傳方盛行故去疾據以  
爲說歟錢曾讀書敏求記曰壬戌冬日葉九來過  
芳草堂云有宋槧本東家雜記因假借繕寫此書  
爲先聖四十七代孫孔傳所編首列杏壇圖說記  
夫子車從出國東門因觀杏壇歷級而上顧弟子



曰茲魯將臧文仲誓將之壇也觀物思人命琴而歌其歌曰暑往寒來春復秋夕陽西去水東流將軍戰馬今何在野草閒花滿地愁考諸家琴史俱失載附錄於此詳其語意未知果為夫子之歌否也云云案此歌偽妄不辨而明會乃語若存疑蓋其平生過尊宋本之失然會云三卷此本實二卷曾云首列杏壇圖說此本杏壇為下卷第三篇且有說無圖亦無此歌不知會所見者又何本也其或誤記歟

右傳記類聖賢之屬二部七卷皆文淵閣著錄

案以上所錄皆聖蹟也以存目之中有諸賢之敘錄名統於一故總標曰聖賢

晏子春秋八卷

編修勵守謙家藏本

舊本題齊晏嬰撰晁公武讀書志嬰相景公此書著其行事及諫諍之言崇文總目謂後人採嬰行事為之非嬰所撰然則是書所記乃唐人魏徵諫錄李絳論事集之流特失其編次者之姓名耳題為嬰者依託也其中如王士禎池北偶談所摘齊



景公圍人一事鄙倍荒唐殆同戲劇則妄人又有  
所竄入非原本矣劉向班固俱列之儒家中惟柳  
宗元以爲墨子之徒有齊人者爲之其旨多尙兼  
愛非厚葬久喪者又往往言墨子聞其道而稱之  
薛季宣浪語集又以爲孔叢子詰墨諸條今皆見  
晏子書中則嬰之學實出於墨蓋嬰雖略在墨翟  
前而史角止魯實在惠公之時見呂氏春秋仲春  
記當梁篇故嬰能先宗其說也其書自史記管晏  
列傳已稱爲晏子春秋故劉知幾史通稱晏子虞

卿呂氏陸賈其書篇第本無年月而亦謂之春秋  
然漢志惟作晏子隋志乃名春秋蓋二名兼行也  
漢志隋志皆作八篇至陳氏晁氏書目乃皆作十  
二卷蓋篇帙已多有更改矣此爲明李氏綿眇閣  
刻本內篇分諫上諫下問上問下雜上雜下六篇  
外篇分上下二篇與漢志八篇之數相合若世所  
傳烏程閔氏刻本以一事而內篇外篇複見所記  
大同小異者悉移而夾註內篇下殊爲變亂無緒  
今故仍從此本著錄庶幾猶略近古焉



案晏子一書由後人摭其軼事為之雖無傳記之名實傳記之祖也舊列子部今移入於此

魏鄭公諫錄五卷

浙江鮑士  
恭家藏本

唐王方慶撰方慶名綝以字行其先自丹陽徙咸陽武后時官至鸞臺侍郎同鳳閣鸞臺平章事終於太子左庶子封石泉縣公諡曰貞事蹟具新唐書本傳此書前題尚書吏部郎中蓋高宗時所居官而本傳不載則史文脫略也傳稱方慶博學

練朝章著書二百餘篇此乃所錄魏徵事蹟唐書藝文志以為魏徵諫事司馬光通鑑書目以為魏元成故事標題互異惟洪邁容齋隨筆作魏鄭公諫錄與此相合方慶在武后時嘗以言悟主召還廬陵後建言不斥太子名以示復位之漸皆人所難能蓋亦思以伉直自見者故於徵諫爭之語摭錄最詳司馬光通鑑所記徵事多以是書為依據其未經採錄者亦皆確實可信足與正史相參證元至順中翟思忠又嘗作續錄二卷世罕流傳明





蘇州彭年採通鑑唐書補為一卷今思忠所續錄  
二卷已於永樂大典內哀輯成編年書寥寥數條  
殊為贅設今故刪年所補不復附綴此書之末焉

李相國論事集六卷

浙江孫仰曾家藏本

舊本題曰李深之文集唐李絳撰深之絳字也隴西  
人擢進士補渭南尉歷中書門下平章事事蹟具  
新唐書本傳今考其書乃唐史官蔣偕編絳奏議  
之文與論諫之事雖以集名實魏徵諫錄之類也  
前有大中五年偕自序稱今中執法夏侯公授余

以公平生所論諫凡數十事其所爭皆磊磊有直  
臣風概讀之令人激起忠義始自內廷終於罷相  
次成七篇著之東觀目為李相國論事集云云其  
說本明此本標題始後人傳寫所妄改歟偕序稱  
七篇今佚其一所存惟為翰林學士時四十六事  
為戶部侍郎時四事為宰相時十五事共六十五  
條敘事朴拙頗乏文采謝狀賀表之類雜錄其間  
多與論諫無關又批答賀屏風一條宣示李栻密  
疏一條盛夏對宰臣一條皆憲宗之事尤與絳無





涉編次蕪雜亦乖體例然遺聞舊事紀錄頗詳多  
新舊唐書所未載亦足以備考核王楙野客叢書  
引其救鄭綱一條論採擇良家子一條謂足補唐  
書之疎葉夢得避暑錄話引其論吐突承璀安南  
寺碑樓一條訂唐書之誤是亦有裨史事之一證  
矣陸游集有此書跋稱舊有兩本其一一本七卷無  
序其一本一卷史官蔣偕作序以序考之偕所序  
蓋七卷者今一卷之本未見而此為七卷之殘本  
乃有偕序豈後人以游跋更正歟

杜工部年譜一卷 江蘇巡撫採進本

宋趙子欒撰子欒字夢授太祖六世孫元祐六年  
進士紹興中官至寶文閣直學士事蹟具宋史本  
傳子欒與魯嘗均紹興中人然子欒撰此譜時似未  
見嘗譜故篇中惟辨呂大防謂甫生於先天元年  
之誤考宋人所作甫年譜又有蔡興中黃鶴二家  
皆以甫五十九歲為大歷庚戌獨子欒持異議以  
為卒於辛亥之冬不知辛亥甫年六十矣且子欒  
以五年庚戌晚秋長河送李十二為甫絕筆甫生

欽定四庫全書總目卷五十七

史部 傳記類一

九



平著述不輟若以六年冬暴疾卒何至一年之內  
竟無一詩此又其不確之證也其所援引亦簡略  
不及魯譜之詳以其舊本而存之以備參考焉爾

杜工部詩年譜一卷

江蘇巡撫  
採進本

宋魯言撰言字季欽嘉興人官至福建提點刑獄  
公事周必大平園集有言墓誌述其官階始末甚  
詳諸書或云字季卿或云海鹽人或云仕至太府  
卿皆誤也言曾注杜詩今存者惟此譜篇首有言  
編次杜工部詩序未有王士禎跋謂甫年譜創始

於呂汲公大防嘗以甫生於睿宗先天元年壬子  
卒於大歷五年庚戌蓋承呂譜之舊也考甫生卒  
之歲諸書往往錯誤舊唐書謂甫卒於永泰二年  
永泰在大歷之前甫詩有大歷三年以下諸作則  
舊書爲誤王觀國辨之是也然觀國云甫生於先  
天元年癸丑卒於大歷五年辛亥不知癸丑乃先  
天之二年卽開元元年辛亥乃大歷六年則觀國  
亦未深考矣元稹作甫墓誌云享年五十九王洙  
原叔註子美詩序曰大歷三年甫下峽入湖南游



衡山寓居耒陽五年夏一夕醉飽卒大歷五年爲  
庚戌歲上距先天元年壬子適五十有九年則甫  
生於壬子無疑言此譜根據呂譜未嘗誤也姚桐  
壽樂郊私語云杜少陵集自游龍門至過洞庭詩  
目次第爲季卿編定一循少陵平生行蹟可以見  
其詩法近時滄陽張氏吳江朱氏所註杜詩其年  
譜大率仿此而推拓之知密於趙子櫟譜多矣雖  
閒有附會又烏可以一眚掩乎

紹陶錄二卷

江蘇巡撫  
採進本

宋王質撰質有詩總聞已著錄質於清熙中奉祠  
山居以陶潛陶宏景皆棄官遺世其同時唐汝舟  
鹿何可繼其風因作此書上卷載栗里華陽二譜  
而各摘其遺文遺事爲題別爲詞以咏之下卷紀  
唐鹿事而附以林居咏物之詩其曰山友詞者皆  
咏山鳥曰水友詞者皆咏水鳥曰山友續詞者皆  
咏山草曰水友續詞者皆咏水草曰山水友續詞  
者則雜咏禽蟲諸物蓋質以耿直忤時阨於權倖  
晚歲欲絕人逃世故以鳥獸草木爲友蓋亦發憤

欽定四庫全書總目卷五十七

史部 傳記類一

十一





之作舊於雪山集外別行

國朝康熙中商邱宋犖嘗摘錄其山友諸詞分爲五卷改題曰林泉結契亦取其有寄懷塵外之致也今觀錄中諸作雖惟意所云往往不甚入格然人品既高神思自別誦其詞者賞之於酸鹹之外可矣

金陀粹編二十八卷續編三十卷

兩淮鹽政採進本

宋岳珂撰珂有九經三傳沿革例已著錄是編爲辨其祖岳飛之冤而作珂別業在嘉興金陀坊故

以名書粹編成於嘉定戊寅續編成於紹定戊子粹編凡高宗宸翰三卷鄂王行實編年錄六卷鄂王家集十卷籲天辨誣五卷天定錄三卷籲天辨誣者記秦檜等之鍛鍊誣陷每事引當時記載之文如熊克中興小歷王明清揮塵錄之類而珂各繫辨證天定錄者則飛經昭雪之後朝廷復爵褒封諡議諸事也續編凡宋高宗宸翰摭遺一卷絲綸傳信錄十一卷天定別錄四卷百氏昭忠錄十卷四卷絲綸傳信錄者飛受官制劄及三省文移劄





付天定別錄者岳雲岳雷岳霖岳甫岳琛等辨誣  
復官告制劄及給還田宅諸制百氏昭忠錄者飛  
歷陣戰功及歷官政績經編於國史及宋人劉光  
祖等所作碑刻行實黃元振等所編事蹟以次彙  
敘者也其宸翰拾遺中舞劔賦乃唐喬潭之作因  
高宗御書以賜故亦載焉編首自序稱況當規恢  
大有爲之秋魚復之圖穀城之略豈無一二可俎  
豆於斯世檢其所當行稽其所可驗而勿視之芻  
狗之已陳云云殆開禧敗衄之後端平合擊以前

時局又漸主戰故珂云爾也其書歲久散佚元至  
正二十三年重刻於江浙行省陳基爲之序又有  
戴洙後序稱舊本佚闕徧求四方得其殘編斷簡  
參互考訂復爲成書故書中脫簡闕文時時而有  
明嘉靖中刻本竝仍其舊今無從考補亦姑仍嘉  
靖舊刻錄之焉

象臺首末五卷

浙江鄭大節家藏本

宋胡知柔編知柔父夢昱字季昭號竹林愚隱吉  
水人嘉定丁丑進士官大理評事以論濟王事貶



死象州寶慶元年追贈員外郎咸淳三年追諡剛  
簡知柔始末未詳考高斯得恥堂存橐有感一首  
稱近者昌言多出諸賢之後其註中有胡評事夢  
昱之子不著其名或卽知柔歟則亦以忠諫世其  
家者也知柔於寶祐四年編其奏疏遺文後又益  
以諡議及諸家贈答題跋之作以成此書而彈文  
亦具載焉其編次頗無法度如第一卷封事及上  
史彌遠書之下忽攙以李孝先梁成大糾彈夢昱  
二疏及徐瑄救夢昱書其下又爲夢昱祭弟文一

篇其下又以追復省劄之類共爲一卷第二卷告  
詞行述之下忽攙以夢昱所進劄子四篇其下又  
贅以趙文等所作夢昱水石圖贊五首共爲一卷  
第三卷諸人贈詩十八首之下忽攙入夢昱自咏  
步王盧溪韻詩二首再寄二首其下又載他人詩  
七首共爲一卷夢昱自咏榕陰圖一首其下又載  
他人詩十六首共爲一卷第四卷爲諸家哀詞祭  
文題跋而第五卷省劄諡議反居其後末附像贊  
六首又與水石圖贊各編而出身印紙題跋亦與



封事題跋各編均龐雜無緒又其書作於宋理宗時安得載及元明人詩文殆必其後人所竄亂非知柔之舊矣徒以夢昱氣節足重故流傳至今而宋史夢昱無傳所載亦不免闕漏今特著之錄以示表章之義焉

魏鄭公諫續錄二卷

永樂大典本

不著撰人名氏案元伊足鼎

原作亦祖丁今改正

魏鄭公諫

錄序云唐王綝諫錄五卷至順初下邳翟思忠為

常州知事摭其餘為續錄二卷其書刻於元統中

明初已罕流傳故彭年蒐採遺文為續錄一篇以補其闕此本載永樂大典中綴王綝所作諫錄之後篇數與伊足鼎所說合蓋即翟思忠所續本也王氏所輯諫錄僅據其所見聞未能賅備唐書魏徵本傳所云前後凡二百餘奏無不剴切當帝心者已不盡傳其他片語單詞隨時獻納者更為史所不盡紀此本雖摭拾眾說與史傳閒有異同且有實非諫諍之事而泛濫入之錄中者然大旨明白切要於治道頗為有補要非他小說雜記比也





據伊足鼎序稱思忠起家為儒官曾著易傳衍太  
元蓋亦好學稽古之士然朱彝尊經義考二書悉  
不著錄蓋不特著作散佚併其名氏翳如矣茲編  
得復見於世豈非幸乎

忠貞錄二卷附錄一卷

江蘇巡撫  
採進本

明李維樾林增志同編維樾字蔭昌增志字可任  
俱吉州安福人是編為其同里卓敬而作卷一為  
遺藁凡詩十九首序二首誌銘一首而冠以像贊  
及遺藁序卷二卷三為後人記載題咏詩文而附

錄黃養正陳茂烈二傳皆敬鄉人也然養正為敬  
門人又死於土木之難其附錄為宜茂烈於敬別  
無淵源而又以棄官養母終於鄉里其事截然不  
類附之忠貞錄中名實舛矣敬非惟死節慷慨震  
耀千古即於乘燕王來朝之時密請乘其不意徙  
封之於南昌計亦良善其疏雖無完本然劉球所  
作傳中尙載其略不錄之於遺藁中亦編次之疎  
也敬在明初不以詩名而所作落落有氣格如五  
言之小舟衝浪出幽鳥背人飛七言之白雲忽去



山在戶紅日乍晴人倚欄絕句晚眺云浣花溪上  
雙楠木老杜草堂生夏寒門外青山三十六讀書  
終日倚欄杆題山水云長松雨過秋聲滿日日攜  
琴自往回安得扁舟乘晚興載將山色過江來栽  
梅云風流東閣題詩客瀟灑西湖處士家雪冷江  
深無夢到自鋤明月種梅花亦皆有致惜其所傳  
不多不能自為一集故仍從崔與之集例入之傳  
記類焉

諸葛忠武書十卷

兩江總督  
探進本

明楊時偉編時偉有春秋編年舉要已著錄初太  
倉王士驥撰武侯全書十六卷時偉病其蕪累更  
撰是書存其連吳南征北伐調御法檢遺事六卷  
而增年譜傳略紹漢雜述四卷共為十卷昔陳壽  
所進諸葛亮集二十四篇其文久佚惟其目尚見  
亮傳末今世所傳亮集四卷由後人採摭而成文  
多依託如梁父吟黃陵廟記之類時偉皆釐正其  
譌又如小說所載轉生章舉之類亦援據正史糾  
其附會較他本特為詳審其排比事迹具有條理





可以見亮之始末亦較士驥原本特為精核舊本與陶潛集合刻題曰忠武靖節二編蓋寓意於進則當為亮退則當為潛然潛之詩文自為別集之流亮之事迹自為傳記之類難以併為一書故今錄此書於史部而潛集則仍著錄於集部焉

甯海將軍固山貝子功績錄一卷

內府藏本

不著撰人名氏所記乃惠獻貝子富喇塔平定浙東之事康熙十三年耿精忠據福建反

聖祖仁皇帝命富喇塔為甯海將軍同大將軍康親王傑書統兵討之是年至台州破賊於黃瑞山又連破之紫雲山九里寺山十四年敗其眾於黃土嶺賊將會養性乘夜遁去遂復黃巖縣進取溫州浙東底定其事具載宗室王公功績表傳及八旗通志中是書蓋即台人所編自十三年四月耿逆初叛至十四年八月賊黨自台州遁還溫州凡所聞見各舉崖略隨條紀錄所述戰功次第雖不若國史所載見於奏報者明晰賅備而情事之委折節





目之纖悉士人得諸目擊者縷舉為詳以與本傳相校亦時有足資參核者焉書前原有記略一篇別記貝子溫台二郡戰績又撫喇事實一篇紀喇縣土寇應賊貝子遣兵討定之事亦俱不言何人所撰又平閩功績聞見錄一篇為閩人金泳所作乃記貝子自浙進兵平閩之事其文亦頗詳悉謹各仍其舊附錄於末以備互稽惟原本各條下俱綴以七言絕句凡九十六首詞旨淺俚無足採錄今竝從刊刪云

朱子年譜四卷考異四卷附錄二卷

兵部侍郎紀昀家藏本

國朝王懋竑撰懋竑字子中寶應人康熙戊戌進士授安慶府教授雍正癸卯

特召入直

內廷改翰林院編修初李方子作朱子年譜三卷其本不傳明洪武甲戌朱子裔孫境別刊一本汪仲魯為之序已非方子之舊正德丙寅婺源戴銑又刊朱子實紀十二卷惟主於鋪張褒贈以誇講學之榮殊不足道至嘉靖壬子建陽李默重編年譜





欽定四庫全書總目卷二十七  
五卷自序謂猥冗虛謬不合載者悉以法削之視  
舊本存者十七然默之學源出姚江陰主朱陸始  
異終同之說多所竄亂彌失其真

國朝康熙庚辰有婺源洪氏續本又有建甯朱氏新  
本及武進鄒氏正譌本或詳或略均未爲精確懋  
竝於朱子遺書研思最久因取李本洪本互相參  
考根據語錄文集訂補舛漏勒爲四卷又備列其  
去取之故仿朱子校正韓集之例爲考異四卷併  
探掇論學要語爲附錄二卷綴之於末其大旨在

辨別爲學次序以攻姚江晚年定論之說故於學  
問特詳於政事頗略如淳熙元年劾奏知台州唐  
仲友事後人頗有異論乃置之不言又如編類小  
學既據文集定爲劉子澄而編類綱目乃不著出  
趙師淵楚辭集注本爲趙汝愚放逐而作乃不著  
其名至於生平著述皆一一縷述年月獨於陰符  
經考異參同契考異兩書不載其名亦似有意諱  
之然於朱子平生求端致力之方考異審同之辨  
元元本本條理分明無程瞳陳建之浮囂而金谿



紫陽之門徑開卷瞭然是於年譜體例雖未盡合  
以作朱子之學譜則勝諸家所輯多矣

右傳記類名人之屬十三部一百十三卷皆文淵閣  
著錄

案此門所錄大抵名世之英與文章道德之  
士也不曰名臣而曰名人者其中或苦節卓  
行而山林終老或風流文采而功業無聞槩  
曰名臣殊乖其實統以有聞於後之稱庶爲  
兼括之通詞爾

古列女傳七卷續列女傳一卷

內府藏本

漢劉向撰向字子政本名更生楚元王之後以父  
任爲輦郎歷中壘校尉事蹟具漢書本傳漢書藝  
文志儒家類載向所序六十七篇註曰新序說苑  
世說列女傳頌圖也隋書經籍志雜傳類載列女  
傳十五卷註曰劉向撰曹大家註其書屢經傳寫  
至宋代已非復古本故曾鞏序錄稱曹大家所註  
離其七篇爲十四與頌義凡十五篇而益以陳嬰  
母及東漢以來凡十六事非向本書然也嘉祐中



欽定四庫全書總目卷五十一  
集賢校理蘇頌始以頌義編次復定其書爲八篇  
與十五篇者竝藏於館閣是輩校錄時已有二本  
也又王回序曰此書有母儀賢明仁智貞順節義  
辨通嬖孽等目而各頌其義圖其狀總爲卒篇傳  
如太史公記頌如詩之四言而圖爲屏風然世所  
行向書乃分傳每篇上下併頌爲十五卷其十二  
傳無頌三傳同時人五傳其後人通題日向換題  
其頌日向子歆撰與漢史不合故崇文總目以陳  
嬰母等十六傳爲後人所附予以頌考之每篇皆  
十五傳耳則凡無頌者宜皆非向所奏書不特自  
陳嬰母爲斷也向所序書多散亡獨此幸存而復  
爲他手所亂故併錄其目而以頌證之刪爲八篇  
號古列女傳餘十二傳其文亦奧雅可喜故又以  
時次之別爲一篇號續列女傳又稱直祕閣呂縉  
叔集賢校理蘇子容象山令林次中各言嘗見母  
儀賢明四傳於江南人家其畫爲古佩服而各題  
其頌像側是回所見一本所聞一本所刪定又一  
本也錢曾讀書敏求記曰此本始於有虞二妃至



趙悼后號古列女傳周郊婦人至東漢梁嬀等以時次之別爲一篇號續列女傳頌義大序列於目錄前小序七篇散見目錄中間頌見各人傳後而傳各有圖卷首標題晉大司馬參軍顧愷之圖畫蘇子容嘗見江南人家舊本其畫爲古佩服各題其頌像側者與此恰相符合定爲古本無疑云云此本卽曾家舊物題識印記竝存驗其版式紙色確爲宋槧誠希覲之珍笈惟蘇頌等所見江南本在王回刪定以前而此本八篇之數與回本合古

列女傳續列女傳之目亦與回本合卽嘉祐八年回所重編之本曾據以爲江南舊本則稍失之耳其頌本向所作曾鞏及回所言不誤而晁公武讀書志乃執隋志之文詆其誤信顏籀之註不知漢志舊註凡稱師古曰者乃籀註其不題姓氏者皆班固之自註以頌圖屬向乃固說非籀說也考顏氏家訓稱列女傳劉向所造其子歆又作頌是譌傳頌爲歆作始於六朝修隋志時去之推僅四五十年襲其誤耳豈可遽以駁漢書平續傳一卷曾



鞏以為班昭作其說無證特以意為之晁公武竟以為項原作則舛謬彌甚隋志載項原列女後傳十卷非一卷也必牽引芻文曲相附會則隋志又有趙母注列女傳七卷高氏列女傳八卷皇甫謐列女傳六卷綦母邃列女傳七卷又有曹植列女傳頌一卷繆襲列女讚一卷將續傳亦可牽為趙母等頌亦可牽為曹植等矣又豈止劉歆班昭項原乎今前七卷及頌題向名續傳一卷則不署撰人庶幾核其實而闕所疑焉

高士傳三卷

江蘇巡撫採進本

晉皇甫謐撰謐字士安自號元晏先生安定朝那人漢太尉嵩之曾孫嘗舉孝廉不行事蹟具晉書本傳案南宋李石續博物志曰劉向傳列仙七十二人皇甫謐傳高士亦七十二人知謐書本數僅七十二人此本所載乃多至九十六人然太平御覽五百六卷至五百九卷全收此書凡七十一人其七十人與此本相同又東郭先生一人此本無而御覽有合之得七十一人與李石所言之數僅





佚其一耳蓋御覽久無善本傳刻偶脫也此外子  
州支父石戶之農小臣稷商容榮啟期長沮桀溺  
荷蓑丈人漢陰丈人顏觸十人皆御覽所引嵇康  
高士傳之文閔貢王霸嚴光梁鴻臺佟韓康矯慎  
法真漢濱老父龐公十人則御覽所引後漢書之  
文惟披衣老聃庚桑楚林類老商氏莊周六人為  
御覽此部所未載當由後人雜取御覽又稍摭他  
書附益之耳考讀書志亦作九十六人而書錄解  
題稱今自披衣至管甯惟八十七人是宋時已有  
二本竄亂非其舊矣流傳既久未敢輕為刪削然  
其非七十二人之舊則不可以不知也

卓異記一卷 內府藏本

舊本題唐李翱撰唐書藝文志則作陳翱註曰憲  
穆時人案李翱為貞元會昌閒人陳翱為憲穆閒  
人何以紀及昭宗其非李翱亦非陳翱甚明宋史  
藝文志作陳翰而注曰一作翱亦不言為何許人  
其序稱開成五年七月十一日乃文宗之末年其  
次年辛酉乃為武宗會昌元年何以書中兩稱武





宗則非惟名姓舛譌併此序年月亦後人妄加而書則未及竄改耳其書皆紀唐代朝廷盛事故曰卓異然中宗昭宗皆已廢而復辟一幽囚於悍母一迫脅於亂臣皆國家至不幸之事稱爲卓異可謂無識之尤矣又讀書志稱所載凡二十七事今檢其標目僅有二十六條或佚其一或中宗昭宗誤合兩事爲一事均未可知也

春秋列國諸臣傳二十卷

兩江總督採進本

宋王當撰當字子思眉山人元祐中蘇軾以賢良

方正薦廷對策入四等調龍游縣尉蔡京知成都舉爲學官不就及京爲相遂不仕事蹟具宋史本傳史稱其嘗舉進士不中退居田野嘆曰士之居世苟不見用必見其言遂著列國名臣傳五十卷則此書其未仕時作也所傳凡一百九十一人各以贊附於後陳振孫書錄解題稱其議論純正文詞簡古於經義多所發明今核其書如謂魯哀公如討陳恆卽諸侯可得之類持論不免踳駁殊非聖人之本意史稱當博覽古人惟取王佐大略蓋



其學頗講作用故其說云然然其編次時世前後  
證引國語史記等書補左傳闕略該備無遺於經  
傳則實有補宋史藝文志載是書作五十一卷本  
傳則作五十卷均與此本不合殆三五字形相近  
傳寫誤歟玉海又載當同時有長樂鄭昂字尙明  
者亦作春秋臣傳三十卷以人類事凡二百十五  
人附名者又三十九人宋志亦著於錄與此書同  
名但無列國字後人傳錄此書或省文亦題春秋  
臣傳溷昂書矣今仍以舊名標題俾有別焉

廉吏傳二卷

浙江巡撫  
採進本

宋費樞撰樞字伯樞成都人自序題宣和乙巳蓋  
作於宋徽宗末年前有辛次膺序稱其以藝學中  
高第其仕履始末則無考也是書書錄解題作十  
卷此本祇分上下二卷與舊目不符然斷自列國  
訖於隋唐凡百十有四人與陳振孫所記人數相  
合則卷數有所合併文字無所刪雍也大旨以風  
厲廉隅為主故但能謹飭簞簋即略其他事節錄  
一長每傳各系以論斷如華歆褚淵之屬皆極爲

欽定四庫全書總目卷五十七

史部 傳記類一

二十七



揚摧褒貶或偶失謹嚴如史稱蓋寬饒深刻喜陷害人樞既病其太清介不能容物庫狄士文史亦稱其深文陷害樞又惜其公正受禍持論亦自相矛盾然如載公孫宏竝著其忌賢之謀載牛僧孺亦書其朋黨之罪綜核大致其議論去取猶可謂不諛不隱者矣

紹興十八年同年小錄一卷

兩淮馬裕家藏本

宋王佐榜進士題名錄也考劉一清錢塘遺事宋時廷試放榜唱名後謁先聖先師赴聞喜宴列敘

名氏鄉貫三代之類具書之謂之同年小錄是科爲紹興戊辰南渡後第七科也所取凡三百三十人又特奏名四百五十七人其四百五十六人原本佚闕錄內僅存一人首載前一年御筆手詔次載策問及執事官姓名又次載進士榜名末乃載諸進士字號鄉貫三代後又有附錄記董德以下三十二人之事而狀元王佐等三人對策之語亦載其略皆附會和議甚力不知何人所記疑宋元間相續而成非出一人之手也宋代同年小錄今



率不傳惟寶祐四年榜以文天祥陸秀夫謝枋得  
三人爲世所重如日星河岳互古長畱足以楮柱  
綱常振興風教而是榜以朱子名在五甲第九十  
講學之家亦自相傳錄得以至今明宏治中會稽  
王鑑之重刻於紫陽書院改名曰朱子同年錄夫  
進士題名統以狀頭曰某人榜進士國制也標以  
年號曰某年登科小錄亦國制也故以朱子傳是  
書可也以朱子冠是書而黜特選之大魁進綴名  
之末甲則不可以朱子重是書可也以朱子名是  
書而削帝王之年號題儒者之尊稱則尤不可鑑  
之所稱蓋徒知標榜門戶而未思其有害於名教  
今仍以原名著錄存其真焉

伊雜淵源錄十四卷

副都御史黃登賢家藏本

宋朱子撰書成於乾道癸巳記周子以下及程子  
交遊門弟子言行其身列程門而言行無所表見  
甚若邢恕之反相擠害者亦具錄其名氏以備考  
其後宋史道學儒林諸傳多據此爲之蓋宋人談  
道學宗派自此書始而宋人分道學門戶亦自此

欽定四庫全書總目卷五十七

史部 傳記類

三五





欽定四庫全書總目卷五十一  
書始厥後聲氣攀援轉相依附其君子各執意見  
或釀爲水火之爭其小人假借因緣或無所不至  
葉紹翁四朝間見錄曰程源爲伊川嫡孫無聊殊  
甚嘗鬻米於臨安新門之草橋後有教之以干當  
路者著爲道學正統圖自考亭以下勦入當事姓  
名遂特授初品因除二令又以輪對改合入官遷  
寺監丞是直以伊雒爲市矣周密齊東野語癸辛  
雜識所記末派諸人之變幻又何足怪乎然朱子  
著書之意則固以前言往行矜式後人未嘗逆料  
及是儒以詩禮發冢非詩禮之罪也或因是併議  
此書是又以噎而廢食矣

名臣言行錄前集十卷後集十四卷續集八卷別集二

十六卷外集十七卷

浙江鄭大節家藏本

前集後集竝朱子撰續集別集外集李幼武所補  
編幼武字士英廬陵人據其續集序文蓋理宗時  
所作其始末則未詳觀其外集所錄皆道學宗派  
則亦講學家矣趙希弁讀書附志載此書七十二  
卷今合五集計之實七十五卷殆傳刻者誤以五



為二歟朱子自序謂讀近代文集及紀傳之書多有裨於世教於是掇取其要聚為此書乃編中所錄如趙普之陰險王安石之堅僻呂惠卿之姦詐與韓范諸人竝列莫詳其旨明楊以任序謂是書各臚其實亦春秋勸懲之旨非必專以取法又解名臣之義以為名以藏偽有敗有不敗者其置詞頗巧然劉安世氣節凜然爭光日月盡言集元城語錄今日尙傳當日不容不見乃不登一字則終非後人所能喻考呂祖謙東萊集有與汪尙書書

曰近建甯刻一書名五朝名臣言行錄

案祖謙所見乃前集

故但稱五朝

云是朱元晦所編其閒當考訂處頗多近

亦往問元晦未報不知曾過目否晦菴集中亦有與祖謙書曰名臣言行錄一書亦當時草草為之其閒自知尙多謬誤編次亦無法初不成文字因看得為訂正示及為幸云云則是書瑕瑜互見朱子原不自諱講學家一字一句尊若春秋恐轉非朱子之意矣又葉盛水東日記曰今印行宋名臣言行錄前集後集續集別集外集有景定辛酉浚





儀趙崇鈺引云其外孫李幼武所輯且云朱子所編止八朝之前士英所編則南渡中興之後四朝諸名臣也今觀後集一卷有李綱二卷有呂頤浩三卷有張浚皆另在卷前不在目錄中又闕殘脫版甚多頗疑其非朱子手筆爲後人所增損必多蓋朱子纂輯本意非爲廣聞見期有補於世教而深以虛浮怪誕之說爲非今其間呂夷簡非正人而記翦髭賜藥之詳余襄公正人而有杖臂懷金之恥蘇子瞻蘇木私鹽等事亦無甚關繫若此者

蓋不一也李居安所謂翦截纂要豈是之謂歟嘗見章副使繪有此書巾箱小本又聞叔簡尙寶家有宋末廬陵鍾堯俞所編言行類編舉要十六卷前後集尙俟借觀以祛所惑云云則盛於此書亦頗有所疑顧就其所錄觀之宋一代之嘉言懿行畧具於斯資檢閱固亦無所不可矣幼武所補大抵亦步亦趨無甚出入其所去取不足以爲重輕以原本附驥而行今亦姑竝存之備考核焉

名臣碑傳琬琰集一百七卷

浙江孫仰曾家藏本

欽定四庫全書總目卷五十七

史部 傳記類一

三三



宋杜大珪編大珪眉州人其仕履不可考自署稱進士而序作於紹熙甲寅則光宗時人矣墓碑最盛於東漢別傳則盛於漢魏之間張晏註史記據墓碑知伏生名勝司馬貞作史記索隱據班固泗上亭長碑知昭靈夫人姓溫裴松之註三國志亦多引別傳其遺文佚事往往補正史所不及故講史學者恆資考證焉由唐及宋撰述彌繁雖其間韓愈載筆不乏諛言李繁摛詞亦多誣說而其議論之同異遷轉之次序拜罷之歲月則較史家爲得真故李燾作續通鑑長編李心傳作繫年要錄往往採用蓋以此也顧石本不盡拓摹文集又皆散見互考爲難大珪乃蒐合諸篇共爲三集上集凡二十七卷中集凡五十五卷下集凡二十五卷起自建隆乾德訖於建炎紹興大約隨得隨編不甚拘時代體製要其梗概則上集神道碑中集誌銘行狀下集別傳爲多多採諸家別集而亦閒及於實錄國史一代鉅公之始末亦約略具是矣中如丁謂王欽若呂惠卿章惇曾布之類皆當時所



謂姦邪而竝得預於名臣其去取殊為未當然朱子名臣言行錄趙汝愚名臣奏議亦濫及於丁謂王安石呂惠卿諸人蓋時代既近恩怨猶存其所甄別自不及後世之公此亦事理之恆賢者有所不免固不能獨為大珪責矣

錢塘先賢傳贊一卷

浙江鄭大節家藏本

宋袁詔撰詔字彥純慶元人淳熙十二年進士授吳江丞歷參知政事贈太師越國公事蹟具宋史本傳詔嘗知臨安府請於朝建許由以下三十九

人之祠而各為之傳贊事在寶慶丙戌至景定五年甲子而祠毀至正二年有呂淵者復其祠重錢傳贊後二年丙戌浙江等處儒學提舉班惟志敘而行之是編猶元時舊刻所紀錄者雖止及一鄉之者舊其中郎簡謝絳等十餘人又俱見於正史然是書為宋人所撰又在元人修史之前於事實多所綜覈如東都事略謝絳傳稱陽夏人是書稱富陽人考宋史本傳謂其先陽夏人祖懿文為杭州鹽官令葬富陽遂為富陽人則是書較為得實





欽定四庫全書總目卷五十一

又東都事略絳本傳不載絳判吏部流內銓及太常禮院亦不載覈吏部官職田及使契丹事此書詳之又是書錢彥遠傳贊載楊懷敏妄言契丹宗真死乃除入內副都知內侍黎用信以罪竄海島赦歸遠得環衛官許懷德高年未謝事彥遠上疏極論之又言楊景宗郭永祐小人宜廢不用而東都事略彥遠本傳不載又錢藻傳贊載藻改翰林侍讀學士知審官東院卒神宗知其貧特賻錢五十萬贈太中大夫而東都事略藻本傳不載又錢勰傳贊載王安石許用以御史勰辭謝安石知不附已命權鹽鐵判官又載奉使高麗却烏王金銀器事而東都事略勰本傳不載沈邁傳贊載知開封府後遷右諫議大夫丁母憂上賜黃金百兩居喪日一食既葬廬墓側以卒而東都事略邁本傳不載凡此多得之故老流傳頗為詳贍修正史者因採以入傳故與宋史頗相脗合傳贊亦古雅可誦固非後來地志家夸飾附會之比也

慶元黨禁一卷 永樂大典本

欽定四庫全書總目卷五十一

史部 傳記類一

三五





不著撰人名氏宋史藝文志亦不著錄惟見永樂大典中題曰滄州樵叟撰蓋與紹興正論均出一人之手序稱淳熙乙巳則作於宋理宗十八年也考黨禁起於甯宗慶元二年八月弛於嘉泰二年二月是書之作蓋距弛禁時又四十四年矣宋代忠邪雜進黨禍相仍國論喧呶已一見於元祐之籍迨南渡後和議已成外憂暫弭君臣上下熙熙然燕雀處堂諸儒不鑒前車又尋覆轍求名既急持論彌高聲氣交通賢姦混糅浮薄詭激之徒相率攀援釀成門戶遂使小人乘其瑕隙又興黨獄以中之蘭艾同焚國勢馴至於不振春秋責備賢者不能以敗亡之罪獨誘諸韓侂胄也且光甯授受之際趙汝愚等謀及宵人復處之不得其道致激成禍變於謀國尤疎恭讀

御題詩章於指盜開門再三致意垂訓深切實爲千古定評講學之家不能復以浮詞他說解矣書中所錄僞黨其五十九人如楊萬里嘗以黨禁罷官而顧未入籍其去取之故亦頗難解蓋萬里之薦朱子實出至公與依草附木攀援門戶者迥異故講



學之家終不引之爲氣類觀所作誠齋易傳陳櫟  
胡一桂皆曲相排抑不使入道學之派知此書之  
削除萬里意亦如斯未可遽執爲定論也至如薛  
叔似晚歲改節依附權姦皇甫斌猥瑣梯榮僨軍  
辱國侂冑旣敗之後又復列名韓黨與張巖許及  
之諸人竝遭貶謫陰陽反覆不可端倪而其姓名  
亦竝見此書中豈非趨附者繁臯鸞竝集之一證  
哉總之儒者明體達用當務潛修致遠通方當求  
實濟徒博衛道之名聚徒講學未有不水火交爭  
流毒及於宗社者東漢不鑒戰國之橫議南北部  
分而東漢亡北宋不鑒東漢之黨錮洛蜀黨分而  
北宋亡南宋不鑒元祐之敗道學派盛而南宋亡  
明不鑒慶元之失東林勢盛而明又亡皆務彼虛  
名受其實禍決裂潰覆之後執門戶之見者猶從  
而巧爲之詞非公論也張端義貴耳集曰朝廷大  
患最怕攻黨伊川見道之明不能免焉清熙則曰  
道學慶元則曰僞學深思由來皆非國家之福斯  
言諒矣謹恭錄

御題冠此書之端用昭萬年之炯戒併詳著古來黨禍

欽定四庫全書總目卷五十一 史部 傳記類一 三七





之由俾來者無惑焉

寶祐四年登科錄一卷

兩淮馬裕家藏本

宋文天祥榜進士題名也首列御試策題一道及詳定編排等官姓名其覆考檢點試卷官為王應麟故宋史文天祥傳載考官王應麟奏其卷稱古說若龜鑑忠肝如鐵石敢為國家得人賀也其一甲第九人為王應鳳即應麟之弟蓋當時法制猶疎未有回避之例耳天祥本列第五理宗親擢第一第二甲第一人為謝枋得第二十七人為陸秀

夫與天祥竝以孤忠勁節搢拄綱常數百年後睹其姓名尚凜然生敬則此錄流傳不朽若有神物呵護者豈偶然哉五甲第一百八十九人朱晞以下原本脫去二十四人今檢錄中四甲二百二十七人趙與溥下注兄與鎮同榜而錄無其名又括蒼彙紀有趙時陳墜衡州府志有羅雷春萬姓統譜有趙良金竝稱寶祐四年進士而此錄亦無之則皆在所闕內矣後有天祥對策一道理宗御製賜進士詩及天祥恭謝詩各一首天祥是年登第



後卽丁父憂歸至己未始授簽書甯海節度判官  
廳公事故謝表中有自叨異數亦旣三年之語此  
錄併載其表文乃後人所增附者也

京口耆舊傳九卷

永樂大典本

不著撰人名氏明楊士奇文淵閣書目焦竑國史  
經籍志皆載其名亦不云誰作者書中蘇庠傳末  
云子家世丹陽先人知其狀爲詳又從其孫請借  
家傳則作者當爲丹陽人庠卒於紹興十七年而  
作者得交其孫則當爲南宋末年人也其書採京

口名賢事迹各爲之傳始於宋初迄於端平嘉熙  
閒其中忠烈如陳東經濟如張慤張縝湯東野劉  
公彥風節如王存王遂蔣猷劉宰文學如沈括洪  
興祖書畫如米芾父子雖皆著在史傳而軼聞逸  
事則較史爲詳至湯東野傳稱明受赦書至東野  
謀於張浚欲匿赦不宣而宋史浚本傳稱浚命守  
臣湯東野祕不宣其說互異證以劉宰漫塘集湯  
侍郎勤王錄跋乃與此書所載合則足以訂宋史  
記錄之誤漫塘集稱陳東於欽宗時凡六上書高



宗時凡四上書宋史東本傳第云於欽宗時五上書高宗時三上書證以此書乃知宋史有據漫塘集為傳聞之譌王鞏甲申雜記謂陳亢以熙甯八年生廓與度證以此書廓中熙甯九年進士則距生歲止一年度中元豐三年進士則距生歲止四年尤足以糾小說附會之謬如此之類不一而足蓋是書體例全倣正史每為一傳首尾該貫生卒必詳與諸家雜說隨筆記載不備端末者不同故事實多可依據於史學深為有裨文淵閣書目載是書不列卷數經籍志則作四卷今據永樂大典所載裒合成編釐為九卷考宋史地理志京口凡丹徒丹陽延陵金壇四縣神宗熙甯五年改延陵為鎮併入丹陽則所存者僅三縣而此書吳致堯傳其人在宣和之季乃仍稱曰延陵人蓋沿襲舊名偶然失改猶漢高帝十一年已改真定為東垣而南越王傳猶稱尉佗為真定人史氏駁文不足為據今仍以三縣分隸庶從其實至於諸書所載互有同異則併附載各條之下以資考證焉





昭忠錄一卷

兩淮馬裕  
家藏本

不著撰人名氏所記皆南宋末忠節事蹟故以昭忠名篇自紹定辛卯元兵克馬嶺堡總管田璪等死節迄於國亡徇義之陸秀夫文天祥謝枋得等凡一百三十人詳其詞義蓋宋遺民之所作也每條先列姓名官爵於前而記其死難事實於後其文間有詳略而大都確實可據以宋史忠義傳互相校核其爲史所失載者甚多卽史傳所有亦往往與此書參錯不合如紹定辛卯西和州徇難之

陳寅宋史亦有傳而其同死之守將楊銳則史竟失載其戰沒事且譌其姓爲王銳又宋史林空齋傳以空齋爲林同之子考此書方知卽同之號史又誤以劉全子爲劉同祖併失載其被執自縊及其妻殉節等事凡此皆當以是書爲得實又張世傑在崖山及謝枋得被徵事所載亦比諸書爲詳考袁桷清容居士集蘇天爵滋溪文集均有修元史時採訪遺書之目不載此名孔齊至正直記所列修史應採諸書亦無此名知元時但民間傳



錄未嘗上送史館故至正間纂修諸臣無由見也  
此本乃舊傳鈔帙文字亦間有譌脫而大略尙可  
考見謹著之於錄庶一代忠臣義士未發之幽光  
復得以彰顯於世且俾讀宋史者亦可藉以考正  
其疎略焉

欽定四庫全書總目卷五十七

番禺史悠乾初校  
番禺高學耀覆校

欽定四庫全書總目卷五十八

史部十四

傳記類二

敬鄉錄十四卷

浙江汪啟淑家藏本

元吳師道撰師道有戰國策校註已著錄是編以  
宋婺守洪遵東陽志所記人物尙有遺漏因蒐錄  
舊聞以補其闕始自梁朝迄於宋末每人先次其  
行略而附錄其所著詩文亦有止著其目者或已  
散佚或從刪汰也明正德閒金華守趙鶴有金華





文統十三卷蓋以是錄爲藍本然鶴所編次往往重復舛漏如此錄載潘良貴矯齋記靜勝齋記荅雷公達書君子有三戒說四篇而文統止載矯齋記及雷公達書二篇刪汰漫無義例殊不及師道本書又如宋方符所編宗忠簡遺集師道謂不及見故集中封事諸篇此錄不載然此錄有贈雞山陳七四秀才五言一首方符所編轉未之及則零篇散什藉以存者不少矣至所編輯宋人小傳猶在宋史未成以前故記載多有異同若謂梅執禮

密與諸將謀奪萬勝門夜入金營劫二帝歸范瓊以爲無益獨吳革與趙子方結軍民得眾數萬王時雍徐秉哲聞之懼使瓊泄謀於金師宋史及東都事略本傳俱不載僅略見三朝北盟會編中惟此書言之頗悉又若宋史載嘉定十四年三月丁亥金師破黃州知州事何大節棄城遁死己亥金師陷蘄州知州事李誠之死是錄載李誠之死事與宋史合而於何大節之遁則引劉克莊荅傳諫議伯成書辨大節初護齊安官吏士民過武昌



復自還齊安固守半月城破金師擁入大節死於  
赤壁磯下則大節實未嘗遁此事與史頗異亦可  
以資考證元好問中州集以詩存史爲世所重師  
道此書殆與相埒以其因人物以存文章非因文  
章以存人物與好問體例略殊故隸之於傳記類  
焉

唐才子傳八卷

永樂大典本

元辛文房撰文房字良史西域人其始末不見於  
史傳惟陸友仁研北雜志稱其能詩與王執謙齊

名蘇天爵元文類中載其蘇小小歌一篇耳是書  
原本凡十卷總三百九十七人下至妓女女道士  
之類亦皆載入其見於新舊唐書者僅百人餘皆  
從傳記說部各書採輯其體例因詩繫人故有唐  
名人非卓有詩名者不錄卽所載之人亦多詳其  
逸事及著作之傳否而於功業行誼則祇撮其梗  
概蓋以論文爲主不以記事爲主也大抵於初盛  
稍略中晚以後漸詳至李建勳孫魴沈彬江爲廖  
圖熊皦孟賓于孟貫陳搏之倫均有專傳則下包



五代矣考楊士奇東里集有是書跋是明初尙有  
完帙故永樂大典目錄於傳字韻內載其全書今  
傳字一韻適佚世閒遂無傳本然幸其各韻之內  
尙雜引其文今隨條摭拾哀輯編次共得二百四  
十三人又附傳者四十四人共二百八十七人謹  
依次訂正釐爲八卷案楊士奇跋稱是書凡行事  
不關大體不足爲勸戒者不錄又稱雜以臆說不  
盡可據今考編中如許渾傳稱其夢遊崑崙李羣  
玉傳稱其夢見神女雜采孟棨本事詩范攄雲溪

友議荒唐之說無當史裁又如儲光羲汚祿山僞  
命而稱其養浩然之氣九乖大義他如謂駱賓王  
與宋之問唱和靈隱寺中謂中興閒氣集爲高適  
所選謂李商隱曾爲廣州都督謂唐人學杜甫者  
惟唐彥謙一人乖舛不一而足蓋文房鈔掇繁富  
或未暇檢詳故謬誤牴牾往往雜見然較計有功  
唐詩紀事敘述差有條理文筆亦秀潤可觀傳後  
閒綴以論多倚摭詩家利病亦足以津逮藝林於  
學詩者考訂之助固不爲無補焉



元朝名臣事略十五卷 大學士于敏中家藏本

元蘇天爵撰天爵字伯修真定人由國子學生試

第一釋褐授從仕郎蘇州判官終浙江行省參知

政事事蹟具元史本傳此書記元代名臣事實始

穆呼哩 原作木華 黎今改正終劉因凡四十七人大抵據諸

家文集所載墓碑墓誌行狀家傳為多其雜書可

徵信者亦採掇焉一一註其所出以示有徵蓋仿

朱子名臣言行錄例而始末較詳又兼仿杜大珪

名臣碑傳琬琰集例但有所棄取不盡錄全篇耳

後蘇霖作有官龜鑑於當代事蹟皆採是書元史

列傳亦皆與是書相出入足知其不失為信史矣

浦陽人物記二卷 浙江范懋柱家天一閣藏本

明宋濂撰濂有洪武聖政記已著錄是書凡五目

曰忠義曰孝友曰政事曰文學曰貞節所紀共二

十有九人而以進士題名一篇附於後歐陽元序

稱其至公甚當不以私意為予奪蓋濂本以文章

名世故所作皆具有史法其書本成於元時後人

編輯濂集者止採錄其論贊而全書則仍別行此





本爲明宏治中歷陽王珍所重刻卷末有濂自跋稱始立橐而廉侯景淵遽取刊布牴牾者多今補定五十餘處視舊行爲小勝末題至正十三年此跋濂集亦未收蓋濂元時所作集多失載今所傳未刻橐皆至正時之遺文可以互證也

古今列女傳三卷

兩江總督探進本

明解縉等奉敕撰先是明洪武中孝慈高皇后每聽女史讀書至列女傳謂宜加討論因請太祖命儒臣考訂未就永樂元年成祖既追上高皇后尊

謚冊寶仁孝皇后因復以此書爲言遂命縉及黃淮胡廣胡儼楊榮金幼孜楊士奇王洪蔣驥沈度等同加編輯書成上進帝自製序文刊印頒行上卷皆歷代后妃中卷諸侯大夫妻下卷士庶人妻時仁孝皇后又作貞烈事實以闡幽顯微頗留意於風教故諸臣編輯是書稍爲經意不似五經四書大全之潦草所錄事蹟起自有虞迄於元明漢以前多本之劉向書後代則略取各史列女傳而以明初人附益之去取



頗見審慎蓋在明代官書之中猶為善本此本為秀水項元汴家所藏猶明內府初刊之版黃虞稷千頃堂書目稱此書成於永樂元年十二月今考成祖御製序實題九月朔旦知虞稷未見原書僅據傳聞著錄矣

殿閣詞林記二十二卷

浙江范懋柱家天一閣藏本

明廖道南撰道南有楚紀已著錄道南自正德辛巳改庶吉士由編修歷官侍講學士在詞垣最久嫻習掌故因集詞林殿閣宮坊臺省諸臣舊事分

類記載以成是編其例凡仕至華蓋武英諸殿者曰殿學文淵東閣者曰閣學兼六館者曰館學晉詹事者曰宮學屬春坊者曰坊學屬宏文者亦曰館學典成均者曰廡學陞本院者曰卿學有節義者曰贈學擅書翰者曰藝學終始本院者曰院學大概仿列傳之例悉載其官階恩遇而事實亦附見焉自卷九以下標題皆作國子監祭酒黃佐侍講學士廖道南同編蓋道南採掇黃佐翰林記之文不沒所自猶有前藉篤實之遺今亦仍從舊本






竝存其名焉

嘉靖以來首輔傳八卷

浙江汪啟淑家藏本

明王世貞撰世貞有弇山堂別集已著錄是編乃紀世宗穆宗神宗三朝閣臣事蹟案明自太祖罷設丞相分其事權於六部至成祖始命儒臣入直文淵閣參預機務但稱閣臣而不以相名其後閣倖干政閣臣多碌碌充位至嘉靖閒始委政內閣而居首揆者責任尤專凡一時政治得失皆視其人為輕重故世貞作此書斷自嘉靖為始以明積

漸所由來前有總序稱閣臣沿革始末已具年表者即指弇山堂別集中之百官表也其所載始楊廷和訖申時行皆以首輔為主而閒以他人事蹟附之於當時國事是非及賢姦進退之故序次詳悉頗得史法惟世貞與王錫爵同鄉錫爵家嘗妄言其女得道仙去世貞據為作傳當時劾錫爵者或并及世貞世貞作此書時仍載入曇陽子事不免文過遂非其餘所紀則大抵近實可與正史相參證不以一節之謬棄其全書也





明名臣琬炎錄二十四卷續錄二十二卷

浙江孫仰曾家藏本

明徐紘編紘字朝文武進人宏治庚戌進士以刑部郎中出為廣東按察司僉事分巡嶺東終於雲南按察司副使是書乃仿宋杜大珪名臣碑傳琬琰集而作所輯自洪武迄宏治九朝諸臣事蹟前錄所載一百十有七人續錄所載九十五人凡碑銘誌傳以及地志言行錄之類悉具焉其中如李景隆之喪師誤國不得謂之名臣惠安伯張昇在戚里中雖有賢聲而始終未嘗任事亦難與勳臣並

列又如陳泰墓誌中稱寇深忌其才名曠人誣劾而李賢所作深墓誌亦在錄中乃極稱其持法嚴明雖自附識語調停究不免彼此矛盾然明自成宏以前風會淳厚士大夫之秉筆者類多質直不支無緣飾夸大之詞尙屬可以取信且其中如郁新吳壽昌等凡數十人皆史傳所不詳考獻徵文亦足以資證據固非小說家言掇拾傳聞構虛無據者比也

今獻備遺四十二卷

浙江巡撫採進本

欽定四庫全書總目卷五十八

史部 傳記類一

九






明項篤壽撰篤壽有小司馬奏草已著錄是編採明代名臣事蹟編為列傳起洪武訖宏治計二百四人蓋本袁表所著而稍增損之明史藝文志亦載其目其曰備遺者自序謂姑備遺忘蓋謙不以作史自任耳明人學無根柢而最好著書尤好作私史其以累朝人物彙輯成編者如雷禮之列卿記楊豫孫之名臣琬琰錄焦竑之國史獻徵錄卷帙最為浩博而冗雜汨濫不免多所牴牾惟篤壽此書頗簡明有法其中所載如劉基飲西湖上見

西北雲氣謂是天子氣在金陵我當輔之此術家附會悠謬之談篤壽乃著之基傳中殊失別擇又如徐有貞之悍鷲李東陽之模稜張孚敬之偏愎皆未可稱一代完人而篤壽推尊過甚其進退亦為寡識然敘述詳贍凡年月先後事蹟異同皆可為博考參稽之助於史學亦未嘗無裨焉

百越先賢志四卷

兩淮鹽政  
探進本

明區大任撰大任字楨伯廣東順德人嘉靖壬戌以歲貢除江都訓導遷光州學正又遷國子監博





士官至南京戶部郎中明史文苑傳附見黃佐傳  
中蓋大任佐之門人也南方之國越爲大自句踐  
六世孫無疆爲楚所敗諸子散處海上其著者東  
越無諸都東冶至漳泉故閩越也東海王搖都於  
永嘉故甌越也自湘灘而南故西越也牂柯西下  
邕雍綏建故駱越也統而名之謂之百越大任家  
於南越因蒐輯百越先賢斷自東漢得一百二十  
人各爲之傳所收兼及會稽以句踐舊疆自南越  
北盡會稽故也惟秦會稽郡跨有吳地者不載以

非越之舊也書中所載如趙煜以著述見收而作  
越紐錄之袁康吳平事出王充論衡乃不見載方  
技收徐登趙炳董奉介象而作參同契之魏伯陽  
亦上虞人名見葛洪神仙傳復不見載蓋大任多  
憑史傳而不甚採錄雜書其間有遺漏在此其體  
例謹嚴勝於地志之尤蔓亦卽在此至於引用史  
文刊除不盡如梅福傳稱語見成紀此自漢書之  
文此書無成帝本紀何得有此語亦未免失之  
因仍而每傳之未必註所據某書又據某書參修





一句一字必有所本尤勝於他家之杜撰均未可  
以一旨議之黃佐修廣東新志漢以前之人物小  
傳皆採是書蓋亦深知纂述之不苟矣萬歷壬辰  
其鄉人游朴嘗為鈔版歲久散佚僅存鈔本第二  
卷中養奮傳傅蠹地傳鄧盛傳綦母俊傳李進傳  
皆殘闕陳某一傳殘闕尤甚僅存姓而佚其名今  
亦各仍原本從闕疑之義焉

元儒考略四卷

浙江巡撫  
採進本

明馮從吾撰從吾字仲好長安人萬歷己丑進士

改庶吉士又改御史以上疏言事廷杖歷遷左副  
都御史以爭紅丸梃擊事乞歸起工部尚書以疾  
辭後竟削奪及奄黨敗詔復官諡恭定事蹟具明  
史本傳是編乃集元代諸儒事實各為小傳大抵  
以元史儒學傳為主而旁採志乘附益之中有大  
書特傳者亦有細書附傳者皆據其學術之高下  
以為進退體例頗為叢碎又名姓往往乖舛如歐  
陽元別號圭齋今乃竟題作歐陽圭既以號作名  
又刪去一字校讎亦未免太疎然宋儒好附門牆





於淵源最悉明儒喜爭同異於宗派尤詳語錄學  
案動輒災梨不啻汗牛充棟惟元儒篤實不甚近  
名故講學之書傳世者絕少亦無匯合諸家勒爲  
一帙以著相傳之系者從吾掇拾殘剩補輯此編  
以略見一代儒林之梗概存之亦足資考證物有  
以少見珍者此之謂歟

欽定八旗滿洲氏族通譜八十卷

乾隆九年奉

敕撰凡甲族謂之大姓其次則謂之乙姓各詳其受氏

之源與始居之地猶劉之標望於彭城韓之湖派

於昌黎也或同姓而異居者則以其地識之如蘇完瓜

爾佳氏葉赫瓜爾佳氏之類猶王之別太原瑯琊李之判隴西

趙郡也或雖同姓而異旗者則連類附見之猶裴

之有東西阮之有南北也其

賜姓者仍列於本族惟詳其蒙

賜之由以昭光寵而不淆其昭穆蒙古高麗尼堪臺尼

堪撫順尼堪久隸八旗者亦追溯從來附著於末

每一姓中取其勳勞茂著者冠冕於首各系小傳





以示旌異其子孫世系官爵以次綴書如元和姓  
纂之例考古者族姓掌於官至春秋之末智果別  
族為輔氏猶聞於太史秦漢以來古制不存家牒  
乃作劉歆七略稱案揚子雲家牒以甘露三年生  
是也案語見李善文選註私記之書亦作世本是也六代及  
唐雖以門第相高而附會攀援動輒疎舛白居易  
一朝名士自敘世系乃以楚白公勝秦白乙丙一  
脈相承他可概見矣洎乎兩宋譜學遂絕非世家  
舊姓罕能確述其宗派者豈非不掌於官各以臆

說之故歟惟我

國家法度修明白

開創之初從龍部屬皆什伍相保聚族而居有古比閭

族黨之遺意故其民數可考而生卒必聞於官子  
孫必登於籍故其族系亦最明披讀是編古太史  
之成規猶可概見八旗之枝幹相維臂指相屬亦  
可概見

聖人制作同符三代類如此猗歟盛矣

欽定宗室王公功績表傳十二卷

欽定四庫全書總目卷五十八

史部 傳記類二

十四





乾隆四十六年奉

敕撰初乾隆二十九年

命宗人府內閣考核宗室王公功績輯為表一卷詳列  
封爵世系傳五卷第一卷第二卷為親王第三卷  
為郡王第四卷為貝勒貝子鎮國公輔國公第五  
卷為王貝勒獲罪褫爵而舊有勳勞者通三十一  
人又附傳二十一人於乾隆三十年六月告成嗣  
以所述簡親王喇布順承郡王勒爾錦貝勒洞鄂  
事實皆不詳悉又順承郡王傳中生有神力之語

亦涉不經乃

詔

國史館恭檢

實錄紅本重為改撰前表後傳體例如舊立傳人數亦如  
舊而事必具其始末語必求其徵信則視舊詳且  
核焉考古者同姓分封惟周為盛然文昭武穆惟  
魯公伯禽有淮徐之功耳諸史列傳載從龍戰伐  
雖不乏懿親亦從無多至四五十人竝奮起鷹揚  
銘勳竹帛共襄萬世之





鴻基者蓋我

國家

世德作求克承

天眷貞元會合光嶽氣鍾太元渾灝之精既挺生乎

列聖扶輿清淑之氣遂竝萃於宗盟記所謂天降時雨山

川出雲乘時佐命非偶然也至我

皇上篤念周親不忘舊績俾效命風雲之會者得以表

章併使席榮珪組之班者知所觀感用以本支百

世帶礪萬年所爲

垂訓而示勸者

聖意尤深遠矣參稽詳慎必再易橐而始成書者豈徒

然哉

欽定蒙古王公功績表傳十二卷

乾隆四十四年奉

敕撰體例與宗室王公功績表傳同考今蒙古諸部其

人率元之部族其地則遼之故疆自遼初上溯於

漢初攻伐之事未嘗絕自元末下迄於明末攻伐

之事亦未嘗絕固由風氣剛勁習於戰鬥恒不冝



欽定四庫全書總目卷五十八  
服屬於人亦由威德不足以攝之故不爲用而反  
爲患也我

國家龍興東土七德昭宣叛盟者芟鋤歸命者綏輯  
自察哈爾林丹汗恃其頑梗卒就滅亡外天命四  
年科爾沁首先內附郭爾多斯杜爾伯特札賴特  
隨之天聰元年敖漢柰曼來歸二年巴林札魯特  
來歸三年土默特來歸六年阿祿科爾沁歸化城  
土默特來歸七年四子部落吳喇忒翁牛特喀喇  
沁來歸八年蒿齊忒烏朱穆秦克西克騰毛明安

來歸九年阿霸垓蘇尼特鄂爾多斯來歸崇德初  
阿霸哈納爾亦來歸莫不際會風雲攀龍附鳳執  
殳効命拔幟先登雖彭濮盧髡景從周武亦蔑以  
加於是焉故折衝禦侮之力名列乎旂常分茅胙  
土之榮慶延於孫子迄今檢閱新編披尋舊迹仰  
見我

列聖提挈乾綱驅策羣力長駕遠馭之略能使柳城松漠  
中外一家咸稽首而效心膂其炳然可傳者章章  
如是誠爲前史所未聞不但諸王公勳業爛然爲



足炳耀丹青也

欽定勝朝殉節諸臣錄十二卷

乾隆四十一年奉

敕撰明白萬歷以還朝綱日紊中原瓦解

景命潛移我

國家肇造丕基龍興東土

王師順動望若雲霓而當時守土諸臣各為其主往

往殞身碎首喋血危疆逮乎掃蕩妖氛

宅中定鼎乾坤再造陬澨咸歸而故老遺臣猶思以

螳臂當車致煩齊斧載諸史冊一一可稽我

皇上幾餘覽古

軫惻遺忠

念其冒刃撓鋒雖屬不知天運而疾風勁草百折不移

要為死不忘君無慚臣節用加

贈典以勵綱常

特命大學士九卿京堂翰詹科道集議於廷俾各以原

官

賜之新諡蓋

欽定四庫全書總目卷五十八

史部 傳記類一

十六





聖人之心大公至正視天下之善一也至於崇禎之季  
銅馬縱橫或百戰捐生或孤城効死雖將傾之厦  
一木難支而毅魄英魂自足千古自范景文等二  
十餘人已蒙

世祖章皇帝易名

賜祭炳耀丹青外其繫馬埋輪沈淵伏劔在甲申三月以  
前者竝

命博徵載籍詳錄芳蹤若夫壬午革除傳疑行遯致身  
一錄見聞雖有異詞抗節諸臣生死要為定據亦

詳為

甄錄追慰忠魂大抵以

欽定明史為主而參以官修

大清一統志各省通志諸書皆臚列姓名考證事蹟  
勒為一編凡立身始末卓然可傳而又取義成仁  
摺柱名教者各予專諡共三十三人若生平無大  
表見而慷慨致命矢死靡他者彙為通諡其較著  
者曰忠烈共一百二十四人曰忠節共一百二十  
二人其次曰烈愍共三百七十七人曰節愍共八





百八十二人至於微官末秩諸生韋布及山樵市  
隱名姓無徵不能一一議諡者竝祀於所在忠義  
祠共二千二百四十九人如楊維垣等失身闖黨  
一死僅足自贖者則不濫登焉書成

奏進

命以勝朝殉節諸臣錄爲名併

親製宸章弁諸簡首

宣付武英殿刊刻頒行以垂示久遠<sub>臣</sub>等竊惟自古代  
嬗之際其致身故國者每多蒙以惡名故鄭樵謂

晉史黨晉而不有魏凡忠於魏者目爲叛臣王凌  
諸葛誕母邱儉之徒抱屈黃壤齊史黨齊而不有  
宋凡忠於宋者目爲逆黨袁粲劉秉沈攸之之徒  
含冤九原可見阿徇偏私率沿其陋其閒卽有追  
加褒贈如唐太宗之於堯君素宋太祖之於韓通  
亦不過偶及一二人而止誠自書契以來未有天  
地爲心渾融彼我闡明風教培植彝倫不以異代  
而岐視如我

皇上者<sub>臣</sub>等恭繹



詔旨仰見

權衡予奪褒鉞昭然不獨勁節孤忠咸邀

渥澤而明昭彰輝立千古臣道之防者春秋大義亦炳

若日星敬讀是編彌凜然於

皇極之彝訓矣

明儒學案六十二卷

山東巡撫  
採進本

國朝黃宗羲撰宗羲有易學象數論已著錄初周汝  
登作聖學宗傳孫鍾元又作理學宗傳宗羲以其  
書未粹且多所闕遺因搜採明一代講學諸人文

集語錄辨別宗派輯為此書凡河東學案二卷列  
薛瑄以下十五人三原學案一卷列王恕以下六  
人崇仁學案四卷列吳與弼以下十人白沙學案  
二卷列陳獻章以下十二人姚江學案一卷列王  
守仁一人附錄二人浙中相傳學案五卷列徐愛  
以下十八人江右相傳學案九卷列鄒守益以下  
二十七人附錄六人南中相傳學案三卷列黃省  
會以下十一人楚中學案一卷列蔣信等二人北  
方相傳學案一卷列穆孔暉以下七人閩越相傳





學案一卷列薛侃等二人止修學案一卷列李材  
一人泰州學案五卷列王艮以下十八人甘泉學  
案六卷列湛若水以下十一人諸儒學案上四卷  
列方孝孺以下十五人諸儒學案中七卷列羅欽  
順以下十人諸儒學案下五卷列李中以下十八  
人東林學案四卷列顧憲成以下十七人蕺山學  
案一卷列劉宗周一人而以師說一首冠之卷端  
所列自方孝孺以下十七人大抵朱陸分門以後  
至明而朱之傳流爲河東陸之傳流爲姚江其餘

或出或入總往來於二派之間宗羲生於姚江欲  
抑王尊薛則不甘欲抑薛尊王則不敢故於薛之  
徒陽爲引重而陰致微詞於王之徒外示擊排而  
中存調護夫二家之學各有得失及其末流之弊  
議論多而是非起是非起而朋黨立恩讎輻輳  
譽糾紛正嘉以還賢者不免宗羲此書猶勝國門  
戶之餘風非專爲講學設也然於諸儒源流分合  
之故敘述頗詳猶可考見其得失知明季黨禍所  
由來是亦千古之炯鑑矣卷端仇兆鼈序及賈潤



所評皆持論得平不阿所好併錄存之以備考鏡  
焉

中州人物考八卷

浙江鮑士  
恭家藏本

國朝孫奇逢撰奇逢有讀易大旨已著錄是編載河  
南人物分爲七科一理學二經濟三忠節四清直  
五方正六武功七隱逸而文士不與焉蓋意在黜  
華藻勵實行也所錄皆明人惟忠節之末附元蔡  
子英一人各爲傳贊多者連數紙少或僅一行  
云無徵者則不詳不以詳略爲褒貶也後一卷曰

補遺曰續補不復以七科標目蓋不欲入之七科  
中故託詞於補續云爾然猶與七科一例雖布衣以  
公稱最後有名無傳者三十四人則直書其名矣  
其贊恕於常人而責備於賢者頗爲不苟惟張王  
傳贊最爲紕繆考王以元樞密知院叛而歸明而  
奇逢以爲善擇主是六臣奉璽歸梁皆善擇主也  
王後輔佐燕王稱兵犯順歿於鐵鉉濟南之戰而  
奇逢以爲得死所是李日月助李希烈隕身鋒鏑  
亦得死所也且蔡子英義不忘元閒關出塞卒歸



故主以終奇逢既列之忠節矣而又獎張玉之叛  
亂不自相矛盾乎至薛瑄本河津人李夢陽本慶  
陽人牽合而歸之中州又其末節矣奇逢雖以布  
衣終而當時實負重望湯斌至北面稱弟子其所  
著作非他郡邑傳記無足輕重者比故存其書而  
具論之俾讀是編者知其瑕瑜不相掩焉

東林列傳二十四卷

浙江巡撫  
採進本

國朝陳鼎撰鼎字定九江陰人明萬歷閒無錫顧憲  
成與高攀龍重修宋楊時東林書院與同志講學

其中聲氣蔓延趨附者幾遍天下互相標榜自立  
門戶流品亦遂糅雜迨魏忠賢亂政之初諸人力  
與摭拄未始非謀國之忠而同類之中賢姦先混  
使小人得伺隙而中之於是黨禍大興一時誅斥  
殆盡籍其名頒示天下至崇禎初權閹既殛公論  
始明而餘孽尚存競思翻案議論益糾紛不定其  
閒姦黠之徒見東林復盛競假借以張其鋒水火  
交爭彼此報復君子博虛名以釀實禍小人託公  
論以快私讎卒至國是日非迄明亡而後已是編





所載一百八十餘人蓋即東林黨人榜及沈灌溫  
體仁等雷平蠅蚋諸錄所著名者也以節義炳著  
者彙載於前餘亦分傳竝列臚敘事蹟頗詳其中  
碩士端人固所不乏而依草附木者實繁有徒厥  
後樹幟分明干撓時政禍患卒隱中於國家足知  
聚徒講學其流弊無所不至雖劫始諸人未必逆  
料及此而推原禍本一二君子不能不任其咎也  
此書仿龔頤正元祐黨籍傳之例於諸人之姓名  
履貫無不本末燦然俾讀者論世知人得以辨別

賢姦而深思其薰蕕雜廁之所以然前事不忘  
後事之師其亦千古炯鑑矣

儒林宗派十六卷

編修周永年家藏本

國朝萬斯同撰斯同有廟制圖考已著錄是編紀  
孔子以下迄於明末諸儒授受源流各以時代  
為次其上無師承後無弟子者則別附著之自  
伊雒淵源錄出宋史遂以道學儒林分為二傳  
非惟文章之士記誦之才不得列之於儒即自





欽定四庫全書總目卷五十一  
漢以來傳先聖之遺經者亦幾幾乎不得列於  
儒講學者遞相標榜務自尊大明以來談道統  
者揚已凌人互相排軋卒釀門戶之禍流毒無  
窮斯同日擊其弊因著此書所載斷自孔子以  
下杜僭王之失以正綱常凡漢後唐前傳經之  
儒一一具列除排擠之私以消朋黨其持論獨  
爲平允惟其附錄一門苟及老莊申韓之流未  
免矯枉過直又唐啖助之學傳之趙匡陸淳宋

孫復之學傳於石介皆卓然自立一家宋代說  
經實濫觴於二子乃列之散儒之中不入宗派  
亦有所未安至於朱陸二派在元則金吳分承  
在明則薛王異尙四百年中出此入彼淵源有  
自脈絡不誣亦未可以朝代不同不爲明其宗  
系如斯之類雖皆未免少疎然較之學統學案  
諸書則可謂湔除錮習無畛域之見矣世所傳  
本僅十二卷此本出自歷城周氏較多四卷蓋



其末年完備之定本云

明儒言行錄十卷續錄二卷

浙江巡撫探進本

國朝沈佳撰佳字昭嗣號復齋仁和人康熙戊戌進士官安化縣知縣是編仿朱子五朝名臣言行錄之例編次有明一代儒者各徵引諸書述其行事亦間摘其語錄附之所列始於葉儀迄於金鉉凡七十五人附見者七十四人續錄所列始於宋濂迄於黃淳耀凡五十九人附見者九人佳之學出

於湯斌然斌參酌於朱陸之間佳則一宗朱子故是編大旨以薛瑄為明儒之宗於陳獻章則頗致不滿雖收王守仁於正集而守仁弟子則刪汰甚嚴王畿王艮咸不預焉其持論頗為淳謹初黃宗羲作明儒學案採摭最詳顧其學出於姚江雖於河津一派不敢昌言排擊而於王門末流諸人流於猖狂恣肆者亦頗為回護門戶之見未免尚存佳撰此錄蓋陰以補救其偏鄞縣萬斯大宗羲之





弟子也平生篤信師說而爲佳作是錄序亦但微以過嚴爲說而不能攻擊其失蓋亦心許之也學者以兩家之書互相參證庶乎有明一代之學派可以得其平允矣正不必論甘而忘辛是丹而非素也

史傳三編五十六卷 江西巡撫採進本

國朝朱軾撰軾有周易傳義合訂已著錄是編凡名儒傳八卷名臣傳三十五卷又續編五卷循吏傳

八卷成於雍正戊申時明史尙未成書故所錄至元而止明以來傳名儒者大抵宗宋而祧漢唐而宋又斷自濂洛以下軾所爲傳上起田何伏生申公諸人不沒其傳經之功中及董仲舒韓愈諸人不沒其明道之力於宋則胡瑗孫復石介劉敞陳襄雖軌轍稍殊亦竝見甄錄絕不存門戶之見可謂得聖賢之大公其以遷就利祿削揚雄馬融以祖尙元虛削王弼何晏以假借經術削匡衡王安石亦特爲平允惟胡寅修怨於生母王柏披猖恣

欽定四庫全書總目卷五十八 史部 傳記類一 二十六





肆至刪改孔子之聖經咸預斯列似爲少濫據王  
福時之虛詞爲薛收作贊亦未免失之不考耳名  
臣傳所列凡一百八十人去取頗爲矜慎續編所  
列又三十九人其凡例曰續編者何擇其次焉者  
也或卷帙編次已定附之於後焉耳然見爲稍亞  
而乙之與失於偶漏而補之其品第則有閒矣混  
而無別亦稍疎也循吏傳所列凡一百二十一人  
雖體例謹嚴而頗未賅備如何易于之類表表在  
人耳目者多見刊削其去取之例亦未明言殆不

可解要其標舉典型以示效法所附論斷亦皆醇  
正固不失爲有裨世教之書矣前有軾及蔡世遠  
總序二篇又三編各有專序一篇蓋名儒傳爲李  
清植所纂名臣傳爲張江藍鼎元李鍾僑所纂循  
吏傳爲張福昶所纂世遠商摧之而軾則裁定之  
云

閩中理學淵源考九十二卷

福建巡撫  
採進本

國朝李清馥撰清馥字根侯安溪人大學士光地之  
孫以光地蔭授兵部員外郎官至廣平府知府是

欽定四庫全書總目卷五十八

史部 傳記類二

三五



欽定四庫全書  
史部傳記類二  
編本曰閩中師友淵源考故序文凡例尚稱舊名  
此本題理學淵源考蓋後來所改序作於草創之  
時成編以後復有增入也宋儒講學盛於二程其  
門人游楊呂謝號爲高足而楊時一派由羅從彥  
李侗而及朱子輾轉授受多在閩中故清馥所述  
斷自楊時而分別支流下迄明末凡某派傳幾人  
某人又分爲某派四五百年之中尋端竟委若昭  
穆譜牒秩然有序其中家學相承以及友而不師  
者亦皆竝列以明其學所自來其例每人各爲小

傳傳末各註所據之書併以語錄文集有關論學  
之語摘錄於後考據頗爲詳核其例於敗名曠節  
貽玷門牆者則削除不載閒有純駁互見者則棄  
短錄長如廖剛傳中刪其初附和議一事胡寅傳  
中但敘不持生母服爲右正言章廈所劾而不詳  
載其由是則門戶之見猶未盡融白璧微瑕分別  
觀之可也

右傳記類總錄之屬三十六部八百八卷皆文淵閣  
著錄



案合眾人之事為一書亦傳類也其源出史記之儒林游俠循吏貨殖刺客諸傳其別自為一書則成於劉向之列女傳冊府元龜有總錄之目今取以名之

孫威敏征南錄一卷

浙江鄭大節家藏本

宋滕元發撰元發初名甫後以避高魯王諱以初字元發為名而更字曰達道東陽人舉進士歷官龍圖閣學士諡章敏事蹟具宋史本傳此本前有結銜題承奉郎守大理評事通判湖州軍州事滕

甫蓋猶未改名時所作也其書乃記皇祐四年孫沔平儂智高事其時沔為安撫狄青為宣撫使沔與青會兵計議進破智高於歸仁鋪沔留治後事及師還余靖勒銘長沙專美狄青朝廷亦以青為樞密使賞資甚厚沔止加秩一等甫以為南征之事本出沔議其措置先備又能以身下狄青卒攘寇難因述為此書以頌沔之績蓋沔知杭州時嘗奇甫才授以治劇守邊方略具有知己之分故力為之表暴如此考宋史載征儂智高事亦於狄青





傳為詳而沔傳頗略然此書備見於宋史藝文志  
陳振孫書錄解題當時皆不以為誣殆必有說是  
亦考史者所宜兼存矣

案削平寇亂之事宜入雜史然此書為表孫  
沔之功非記儂智高之變故入之傳記類中

驂鸞錄一卷 浙江鮑士恭家藏本

宋范成大撰成大字致能號石湖居士吳郡人紹  
興二十四年進士孝宗時累官權吏部尚書參知  
政事進資政殿學士提舉洞霄宮卒諡文穆事蹟

具宋史本傳此編乃乾道壬辰成大自中書舍人  
出知靜江府時紀途中所見其曰驂鸞者取韓愈  
詩遠勝登仙去飛鸞不暇驂語也書末有云若其  
風土之詳則有桂海虞衡志焉考虞衡志作於自  
桂林移帥成都時其初至粵時未有也則此書殆  
亦追加刪潤而成者歟中間序次頗古雅其辨元  
結浯溪中興頌一條排黃庭堅等之刻論尤得詩  
人忠厚之旨其載仰山孚忠廟有楊氏稱吳時加  
封司徒竹冊尚存文稱保大元年又稱向得吳江





村寺石幢所記亦以保大紀年因疑錢氏有浙時  
或曾用楊氏正朔以此二物爲證然考之於史錢  
楊屢相攻擊互有負勝其勢殊不相下斷無臣事  
淮南之理而楊氏亦自有武義順義乾貞太和諸  
年號其吳越之保大正當順義四五年亦不應有  
一國兩元之事成大所見或出自後人偽造也吳  
任臣作十國春秋紀元表於此事不加辨證當由  
未檢此書歟

吳船錄二卷

浙江鮑士  
恭家藏本

宋范成大撰成大於淳熙丁酉自四川制置使召  
還取水程赴臨安因隨日記所閱歷作爲此書自  
五月戊辰迄十月己巳於古蹟形勝言之最悉亦  
自有所考證如釋繼業紀乾德二年太祖遣三百  
僧往西方求舍利貝多葉書路程爲他說部所未  
載頗足以廣異聞又載所見蜀中古畫如伏虎觀  
孫太古畫李冰父子像青城山丈人觀孫太古畫  
黃帝及三十二仙真長生觀孫太古畫龍虎及玩  
丹石寺唐畫羅漢一版皆可補黃休復益州名畫

欽定四庫全書總目卷二十八

史部 傳記類一

三三



記所未及又杜甫戎州詩重碧拈春酒句印本拈  
或作酤而成大謂敘州有碑本乃作粘字是亦註  
杜集者所宜引據也

入蜀記六卷

光祿寺卿陸  
錫熊家藏本

宋陸游撰游字務觀號放翁山陰人佃之孫宰之  
子初以蔭補登仕郎隆興初賜進士出身嘉泰初  
官至寶謨閣待制事蹟具宋史本傳游以乾道五  
年授夔州通判以次年閏六月十八日自山陰啓  
行十月二十七日抵夔州因述其道路所經以爲

是記游本工文故於山川風土敘述頗爲雅潔而  
於考訂古蹟尤所留意如丹陽皇業寺卽史所謂  
皇基寺避唐元宗諱而改李白詩所謂新豐酒者  
地在丹陽鎮江之間非長安之新豐甘露寺很石  
多景樓皆非故蹟真州迎鑾鎮乃徐溫改名非周  
世宗時所改梅堯臣題瓜步祠詩誤以魏太武帝  
爲曹操廣慧寺祭悟空禪師文石刻保大九年乃  
南唐元宗非後主庾亮樓當在武昌不應在江州  
白居易詩及張舜臣南遷志竝相沿而誤歐陽修



詩江上孤峯蔽綠蘿句綠蘿乃溪名非泛指藤蘿  
宋玉宅在秭歸縣東舊有石刻因避太守家諱毀  
之皆足備輿圖之考證他如解杜甫詩長年三老  
字及攤錢字解蘇軾詩玉塔臥微瀾句解南方以  
七月六日作七夕之由辨李白集中姑孰十詠歸  
來乎笑矣乎僧伽歌懷素書歌諸篇皆宋敏求所  
竄入亦足廣見聞其他搜尋金石引據詩文以參  
證地理者尤不可殫數非他家行記徒流連風景  
記載瑣屑者比也

西使記一卷

兩淮鹽政  
採進本

元劉郁撰郁真定人是書記常德西使皇弟錫里  
庫軍中往返道途之所見王惲嘗載入玉堂雜記  
中此蓋別行之本也元史憲宗紀二年壬子秋遣  
錫喇征西域蘇丹諸國是歲錫喇薨三年癸丑夏  
六月命諸王錫里庫及烏蘭哈達帥師征西域法  
勒噶巴哈台等國八年戊午錫里庫討回回法勒  
噶巴平之擒其王遣使來獻捷考世系表睿宗十  
一子次六曰錫里庫而諸王中別無錫喇郭侃傳



侃王子從錫里庫西行與此記所云王子歲皇弟  
錫喇統諸軍奉詔西征凡六年拓境幾萬里者相  
合然則錫喇即錫里庫因元史為明代所修故譯  
音譌舛一以為錫喇一以為錫里庫誤分二人而  
憲宗紀二年書錫喇薨三年重書錫里庫西征遂  
相承誤載也此記言常德西使在己未正月蓋錫  
里庫獻捷之明年所記雖但據見聞不能考證古  
蹟然亦時有異聞郭侃傳所載與此略同惟譯語  
時有譌異耳我

皇上神武奮揚戡定西域崑崙月朏盡入版圖計常德  
所經今皆在屯田列障之內業已

欽定西域圖志昭示億齡郁所紀錄本不足道然據其  
所述亦足參稽道里考證古今之異同故仍錄而  
存之也

保越錄一卷 浙江吳玉  
墀家藏本

不著撰人名氏載元順帝至正十九年明師攻紹  
興事是時明將為胡大海禦之者張士誠將呂珍  
也凡攻三月卒不能下乃還是錄稱士誠兵曰我

欽定四庫全書總目卷五十一 史部 傳記類一 三





軍稱珍曰公殆士誠未亡時紹興人所紀其中稱明為大軍及太祖高皇帝字則疑士誠亡後明人傳鈔所改耳紹興自是以後猶保守八年及至正二十六年始歸於明珍亦至是年湖州之敗乃降於徐達雖初事非主晚節不終而在紹興則不為無功矣大海攻紹興挫衄及其縱兵淫掠發宋陵墓諸惡蹟明史皆不載所錄張正蒙妻韓氏女池奴馮道一妻抗節事明史亦皆不書尤足補史傳之遺

閩粵巡視紀略六卷 浙江巡撫採進本

國朝杜臻撰臻字肇余秀水人順治戊戌進士官至禮部尚書康熙二十二年臺灣既平諸逆殄滅沿海人民皆安堵復業臻時為工部尚書奉

詔與內閣學士石柱往閩粵撫視畫定疆理以十一月啓程二十三年五月竣事因述其所經理大略為此書首沿海總圖次粵略三卷次閩略二卷次附紀臺灣澎湖合為一卷蓋臻巡歷由廣達閩故以為先後之序臺灣則未經親歷其地第據咨訪所得者錄之故附於編末也書中排日記載凡沿海形

欽定四庫全書總目卷二十一 史部 傳記類一 三七





勢及營伍制度兵數多寡縷列甚詳於諸洋列戍  
控置事宜俱能得其要領其山水古蹟及前人題  
咏閒為考證亦可以資博覽蓋據所目見言之與  
摭拾輿記者固異也

扈從西巡日錄一卷

大學士英廉家藏本

國朝高士奇撰士奇有春秋地名考略已著錄康熙

癸亥

聖祖仁皇帝巡幸山西

駐驛五臺山士奇時以侍講供奉

內廷扈從往來因記途中所聞見始於二月十二日

甲申迄於三月初七日戊申凡山川古蹟人物風

土皆具考源流頗為詳核而

鑾輿時巡太平盛典亦一一具載伏而讀之猶仰見

聖化咸熙豫游和樂之象洵足以傳示來茲卷末載詩二

十四首皆其途中所作彙附於後者也士奇筆札

本工又幸際

聖朝預驂法從因得以筆之簡牘流布至今亦可謂遭逢

之至幸而文士之至榮矣





松亭行紀二卷通行本

國朝高士奇撰康熙辛酉二月癸酉

聖祖仁皇帝恭奉

太皇太后行幸溫泉四月戊子

駕出喜峯口士奇皆扈從因紀其來往所經謂喜峯口為

古松亭關故以名書然松亭關在喜峯口外八十

里士奇合而一之未詳考也所述灤河源流亦不

明確至溫泉有硃砂礬石硫磺三種

聖祖御製幾暇格物編中言之甚明士奇日侍

禁闔典文翰之職不應不睹乃仍襲宋唐庚揣測之說

殆不可解以其敘述山川風景足資考證而附載

詩文亦皆可觀故所著塞北小鈔別存其目而此

編則仍錄之焉

右傳記類雜錄之屬九部二十一卷皆文淵閣著錄

案傳記者總名也類而別之則敘一人之始

末者為傳之屬敘一事之始末者為記之屬

以上所錄皆敘事之文其類不一故曰雜焉

欽定四庫全書總目卷五十八

番禺史悠乾初校  
番禺高學耀覆校

欽定四庫全書總目卷五十八

史部 傳記類一

三五











897  
102



国立国会図書館 タイトル『欽定四庫全書總目200卷首1卷』 請求記号 897-102

ガラス使用





国立国会図書館

タイトル『欽定四庫全書總目200卷首1卷』 請求記号 897-102

ガラス使用